

Date – 13/02/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

- 1. Mizorama Local Council leh Village Council inthlanah rorel lai ZPM Party in seat an la tam ber.**
- 2. Khawvel pum huap “Radio Nipualin vawiin khan Akashvani Aizawl buatsaihin Radio pawimawhna leh mipuite beng ti var tura radio tangkaizia inzirtirna hun hman a ni.**
- 3. Prime Minister Narendra Modi leh US Director of National Intelligence Tulsi Gabbardh te chu vawiin khan Washington ah an inkawm.**
- 4. Income Tax Bill,2025 chu vawiin khan Lok Sabha ah Union Finance Minister Nirmala Sitharaman chuan a pu lut.**

<><><>

LC/VC ELECTION

Mizorama Local Council leh Village Council inthlanah rorel lai ZPM Party in seat an la tam ber a,

State Election Commission tarlan danin Village Council-ah ZPM in seat 1153 la in, anmahni hnaih ber tu MNF in seat 744 an la a, Congress in seat 406 la in, BJP in seat 17, HPC in seat 4 leh Independent in seat 87 an la a ni.

Local Council pahnih - Aizawl Municipal Corporation leh Lunglei Municipal Council-ah seat hmuh belhkhawm chu ZPM in seat 363, MNF in seat 197, Congress in seat 147 leh Independent in seat 11 an la a.

Mizoram pumpuia Village Council zawng zawngah voter zaa 75.43 in vote an thlak a, Lunglei district-ah vote tla tha berin voter zaa 80.93 in vote an thlak a ni.

Local Council pahniha ah vote za zela 64.79 a tla a, Aizawl Municipal Corporation hnuaiah voter zaa 63.87 in vote thlakin, Lunglei Municipal Corporation hnuaiah voter zaa 70.17 in vote an thlak a ni.

State Election Commissioner Dr. H. Lalthlanglana chuan Local Council leh Village Council inthlan chu boruak muanawm tak hnuaiah tluang taka zawh fel a nih thu a sawi a. Thawktute, mipui, NGO leh MPF te hmalakna, thahnemngaihna leh inpekna zarah boruak chhia leh duhawmlo report awmlo a neih a ni chu lawmawm a tih thu sawiin mipuiten khua leh tui tha an nihna ang a an chanvo thahngem ngai taka hlen chhuak a vote an thlak rah a nih thu a sawi.

<><><>

WORLD RADIO DAY

“Radio Ni”, “World Radio Day” pualin vawiin khan Akashvani Aizawl buatsaihin Radio pawimawhna leh mipuite beng ti var tura radio tangkaizia inzirtirna hun hman a ni.

Akashvani Aizawl Director leh Mizoram Cluster Head Pu DR Lalropuia chuan World Radio Day puala thuchah a sawina ah Radio chu tunlai khawvel hmasawn zelah ngaihhlut ala hlawh reng a ti a, mipuite thinlungah ala hlu reng tih sawiin Radio thupui midangte hrilhhriat, zirtir leh hriattur pawimawh chhawpchhuah kawngah nasa taka tan lak ani tih sawiin Radio program hrang hrang leh chanchinthar ngaithla chhunzawm zel turin mipuite a sawm a ni.

Pu DR Lalropuia chuan World Radio Day chu kum 1946 atanga bul tan a ni a ti a, Kuminah chuan sik leh sa inthlak mek chungchang - Radio & Climate Change chu thupuih hman a ni tih sawiin thupui hmangin station hrang hrangah hman a ni a ti bawk.

Byte of Pu DR Lalropuia (30 secs)

Akashvani Aizawl buatsaihin vawiin khan World Radio Day pualin Reiek Community Hall ah Hriselna kawnga inzirtirna buatsaih a ni a, Radio programme hrang hrang ngaithla tha mi pasarih (7) hnenah Radio pek a ni bawk.

Health Awareness Campaign & Gift a Radio Campaign puala hun hmanah hian Pu Samuel Z. Hrangte, Asst Director (Program) chuan Broadcast Infrastructure Development Scheme hnuaiah program siam tura an rawn tih angin Akashvani Aizawl chuan thil chi hrang hrang an buatsaih tih a sawi.

Byte of Pu Samuel Z. Hrangte (21 secs)

Vawiina hun hmanah hian National Tobacco Control Program (NTCP) atanga Nodal Officer pahnih Dr H. Lianthangpuia leh R. Lalremruata ten taksa vawn hrisel nana mipuite tihtur zirtirna an pe a, Reiek khawtlang hruaitute leh Reiek High School bakah Reiek Middle School naupangte he hunah hian an tel a ni.



INTERNATIONAL CONDOM DAY OBSERVED AT AIZAWL

Mizoram State Aids Control Society (MSACS), AIDS Healthcare Foundation India Cares leh Samaritan Society of Mizoram-te hmalaknain vawiin khan International Condom Day 2025 hman a ni.

He hun Aizawl-a Millenium Centre chung zawla nghah hi Mizoram State Aids Control Society Project Director Dr. Jane Rinsangi Ralte chuan hawngin hemi atana beihpui thlakna Generation C Campaign-in a tum ber chu thalaite zinga mipat hmeichhiatna atanga natna inkaichhawn theih hrang hrang leh HIV darh zel tur venhimna a nih thu leh condom hman tangkaina leh pawimawhzia zirtirna mai nilo in, nupui/pasal nei hmaa mipat hmeichhiatna hman loh zirtirna uar taka kalpui a nih thu te, HIV leh mipat hmeichhiatna hman atanga natna inkaichhawn theih hrang hrang laka mi tinte an fihlim nan Condom hman ziah pawimawhna leh tulna kalpui a ni dawn bawk tur thu a sawi a.

Hemi kawng beihpui thlakna Love Brigade Campaign hi kum 2020 atanga kalpui tawh niin, tun tum a thawhhnihna ah hian Two Wheelers Taxi Association te nen tangkawpin Two Wheelers Taxi Driver engemawzat hnenah

Condom jacket sem a ni a. Heng bakah hian Love Brigade Campaign thawh hnihna ah hian Aizawl a Auto Drivers Association te hnenah HIV chungchang zirtirna hmanruaw dahna tur seat cover sem a ni dawn bawk a ni.

International Condom Day hi kum 2009 atang khan February ni 13 ah hman thin a ni.



DRUGS DISPOSED

Mizoram Police CID (Crime) te chuan Special Narcotics Police Station Ruihhlo mante Methum Silaimuala thil halralna hmunah an hal ral.

Vawiin a ruihhlo halral te hi Heroin kg 8.953, Methamphetamine kg 184.95, Crystal Meth kg 1 leh Codeine kg 72 a ni a. Ruihhlo halral zawng zawngte hi kg 266.903 niin vaibelchhe sawmhni pakua nuai sawmsarih pali leh sanghni a ni.

Ruihhlo halralna hun hi CID (Crime) SP Pu Rahul Alwal an a kaihruaia. CID DIG Pu Dingluaia chuan he hun hi hmanpui in Mizoram Police te chu ruihhlo dona kawnga tan la tura fuihin ruihhlo do chu Mizoram Police tana hna pawimawh berte zinga mi a nih thu a sawi.



LUNGLEI DRAGON FRUIT MOU

Lungleia dragonfruit chingtute'n an thlai thar chhuahte man bithliah (rate) felfai leh man man zawka an hralh chhuah theih nan inremna an siam a,

Lungleia District Horticulture Office-ah Mizoram Dragonfruit Farmers' Association (MIDFA), Sub-Headquarters leh Tawitlang Farmers Producers Company te chuan kumina dragonfruit thar chhuah, lei leh hralh chungchanga inremna hi an ziaak a ni.

He an inremnaah hian Lunglei District chhunga thar chhuah dragonfruit tha chu MIDFA Sub-Hqrs, Lunglei te hnen atangin Tawitlang Farmers Producers Company te hian kg khat Rs 130/-in an leisak dawn a. Inremna an siam hian ni 30.11.2025 thleng a huam dawn a. Dragonfruit lei turte hi a grade then a ni dawn lo va; amaherawchu, a pum hmin tha leh him chauh an lei dawn thung a ni. Dragonfruit thar chhuahte lak khawm, thliar fel, buk leh hralhna hmun atan Mualthuam 'N', Pukpui leh DHO Office, Lungleiah collection centre dah tum a ni bawk.

He inremna hi a hralhtu lam, MIDFA Sub-Hqrs Lunglei aiawhin President Pu R. Lalthanmawia leh Secretary Pu Lalramengmawia te'n hming ziaakin, a leitu tur lam, Tawitlang Farmers Producers Company ai awihin Chief Executive Officer Pu Lalthlamuana Sailo leh General Manager Pu Vanlaltanpuia te'n hming an ziaak thung a. Lunglei District Horticulture Officer Pu B. Lalzarzova leh Lunglei District Commerce & Industries Officer Pu F. Lalsawmliana te'n an hriatpui bawk a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modi leh US Director of National Intelligence Tulsi Gabbardh te chu vawiin khan Washington ah an inkawm a. Ram pahnih ten intelligence lama an thawhdunna tih chak zel dan tur an sawidun a. Hruaitu pahnihte hian firfiak dona kawngahte, cybersecurity chungchangte, tunlaia harsatna lo lian chho mek leh thuruk inthleng tawn chungchangte an sawidun a. Ram pahnih inkar bakah khawvel thil thleng pawimawhte an sawidun bawk a ni.

Kan Corr report i lo ngaithla ang u.

Prime Minister Narendra Modia hian tukin khan US a thleng a. Hlawhtling taka France a tlawh hnuah PM Modia hian US President Donald Trump-a sawmna angin Washington a thleng a. US-a a cham chhungin President Donald Trump nen an inkawm bakah US sawrkar hotute, sumdawng liante leh India mi chengte a kawm dawn bawk a ni.

PM Modia hian Washington a thlen hian US-a India palai Vinay Mohan Kwatra leh mi pawimawh dangten airport ah an lo hmuak a. Hei bakah hian India mi cheng tam takin khawvawt tak hnuaiah an lo hmuak bawk a ni.

<><><>

INCOME TAX

Income Tax Bill,2025 chu vawiin khan Lok Sabha ah Union Finance Minister Nirmala Sitharaman chuan a pu lut. He bill hian income tax lak dana dan awmsa a siamtha dawn a ni. Thusawiin Union Finance Minister Nirmala Sitharamani chuan Income Tax dan thar hi a hmasa nen khaikhinin section leh chapter a tlem zawk a ti a. Mi narante pawhin awlsam taka an hriatthiam theih tura siam a ni a ti a.He bill hi a ngaihtuah tur bik Parliament committee ah thawn a ni ang a, Session neih leh hmasa ber ni khat niah an report an thehlut ang a ti. Pi Sitharaman-I hian Income Tax chungchang hi budget a pharh tum khan sawilangin kum khata cheng nuai 12 lalut chin ten income tax an pe tawh dawn lo tih a sawi a ni.

Hei bakah hian Joint Committee on the Waqf (Amendment) Bill, 2024 chu vawiinah hian Lok Sabha ah pharh a ni bawk.

<><><>

RADIO DAY

Vawiin khan World Radio Day hman a ni a. New Dehi ah Union Information and Communication Secretary Sanjay Jaju chuan Radio Festival a hawng. He hunah hian Akashvani Director General, Dr. Pragya Paliwal Gaur pawh a tel a ni.

Kumtinin February ni 13 ah hian Radio Day hman thin niin mipuite hnenah Radio pawimawhna leh thu pawimawh hriatna kawnga Radio thatna inzirtir thin a ni a. Radio avanga mipui inpumkhatna lo awm leh mi nuna nghawng tha a neihte inhrilhtharna ni atan hman thin a ni bawk. Kumin Radio Day ah hian thupuihah Radio & Climate Change tih chu hman a ni. Radio Day puala a thuchahah Prasar Bharati Chairman Navneet Kumar Sehgal chuan Radio hmanga thu leh thla thehdarh avangin hnam leh eibar hmasawnaah an pawimawh hle a ti.

**Akashvani Director General Dr. Pragya Paliwal Gaur pawhin kum 90
chhung chu radio chuan a ngaithlatute hnenah thu leh hla rinawm takin a lo pe
tawh thin a ti.**

<><><>